

2 TESALONICENSES

Saludo

1 ¹Núa Pablo, Silvano yáapicha, áibaalí ípidenéeri Silas, Timoteo yáapicha nacái, nutànàacué pirí cuyàluta, píacué wéenánái yeebáidéeyéica Jesucristo itàacái Tesalónica ìyacàlená irìcu, píacué iyéeyéica abédanamata Wáaniri Dios yáapicha, Wáiwacali Jesucristo yáapicha nacái. Wawàwalicué pía. ²Wasutáca Wáaniri Dios ícha pirípínacué, Wáiwacali Jesucristo nacái namànínápínacué pirí cayábéeri mawèníiri iyú, namàacáanápínacué nacái pìyaca matuíbanáiri iyú.

Dios juzgará a los pecadores cuando Cristo vuelva

³Píacué wéenánáica, casíimáica wàaca Dios irí cayábéeri càiripináta pìwalicué. Yá cayábaca càì wamànica peebáidacáinacué pìacawa Jesucristo itàacái manuísíwata cachàiníwanái, yá nacái wáalíacawa cáinináanacué yáwanái piicáyacacawa mamáalàacata. ⁴Iná wacàlidacuéca piináwaná ìwali casíimáiri iyú áibanái irí Dios yàasu wenàiwicaca yeebáidéeyéica Jesucristo itàacái macái yàcalé wapáchiacatabàa. Wacàlidaca nalíni pìidenìanacuéca piùwichàanáwa mamáalàacata matuíbanáiri iyú, peebáidáanacué nacái mamáalàacata Jesucristo itàacái éwitacué áibanái nàuwichàidacáanítacué pía madécaná yàawiría, éwitacué nacái piùwichàacáanítawa madécaná càulenéeri wawàsi iyú. ⁵Iná yéewa wáalíacawa amaléeri iyú Dios yàanápíná macái wenàiwica iwèni machacàníiri iyú, namànicaalí cayábéeri, càita nacái namànicaalí nabáyawanáwa. Siùcade piùwichàacuécawa pìyaca ìwalíse yái peebáidáanacuéca iyúwa Dios ichùulianacué pía, quéwa càmitacué piméyáawa peebáidaca. Iná Dios icàlidapínacué piináwaná ìwali pimànínacuéca cayábéeri, yá imàacapínacué piwàlùacawa Dios

iyacàle iriculé Dios icùacataléca yàasu wenàiwicanáíwa càiripináta chènuniré.

⁶Dios yàapíná macáí wenàiwica iwèni machacàníiri iyú, yùuwichàidapíná nacáí níara wenàiwica nabáyawaná ìwalísewa, níái yùuwichàidéeyéicuéca pía siùcade. ⁷Dios yàapíná macáí wenàiwica iwèni machacàníiri iyú, imàacapínacué nacáí piyamáidacawa piùwichàacáí íichawa càide iyúwa imàacáanápíná wayamáidaca nacáíwa. Càipíná Dios imànica walí macáita néenialípiná Wáiwacali Jesús yàanàacaalípiná chènuníise mèlumèluíri iyú, quichái ipèrèa yèewíise yàasu cachàiníiyéi ángel yáapichawa. ⁸Yá Wáiwacali Jesús yàanàapíná yùuwichàidacaténá wenàiwica nabáyawaná ìwalísewa, níái càmfíyéica iwàwa yáalíaca Dios ìwali, macáita nacáí càmfíyéica yeebáida yái tàacáisi fíméerica Wáiwacali Jesucristo iwàsàaca wenàiwicanáí Dios yàasu yùuwichàacáisi íicha. ⁹Yá Wáiwacali yúucapíná íichawa nía déeculé, nàuwichàacaténáwa nabáyawaná ìwalísewa càiripináta, èeri càmfíiri imáalàawa, yá càmita quirínama naicáca Wáiwacali, yái mèlumèluíríca iicacánáwa, icuèrica macáita cáimiétacanéeri iyú, máinícáiná cachàinica íiwitáise manuúri. ¹⁰Càipíná Wáiwacali imànica nalíwa néenialípiná yàanàacaalípiná àniwa. Yàapínacawa néese àniwa yéewacaténá macáita yàasunái, wía yeebáidéeyéica itàacái, wàaca irí cayábéeri manuúsíwata cáimiétaquéeri iyú casíimáiwaca. Núalía nacáíwa piicáanápínacué Wáiwacali yàanàaca, pìapínacué nacáí irí cayábéeri, peebáidacáinacué iyúwaté wacàlidáaná píri Wáiwacali iináwaná.

¹¹Wáalíacawa pìanápínacué Wáiwacali irí cayábéeri néenialípiná, íná wasutáca Wacuèriná Dios íicha píripínacué mamáalàacata. Wasutáca Dios íicha iyúudàanápínacué pía pìyacaténacué càide iyúwa wenàiwica Dios imáidéeyéica nàyacaténá machacàníiri iyú càide iyúwa Dios iwàwáaná. Càita nacáí wasutáca Dios íicha píripínacué ichàiniadáanápínacué pía íiwitáise cachàiníiri iyúwa, pimànicaténacué macáí cayábéeri wawàsi piwàwéericuéca pimànica, yá nacáí píibaidacalécuéca pimàníríca peebáidacáinacué Jesucristo itàacái. ¹²Càita wasutáca Dios íicha píripínacué yéewanápíná áibanái nacáí nàapínáca Wáiwacali Jesús irí cayábéeri naicácaalípiná ichàiniadacuéca pía pimànicaténá cayábéeri, yéewanápíná nacáí píacué iyéeyéica abédanamata Wáiwacali Jesús yáapicha píasáidacuéca áibanái irí cayábéeri íiwitáisevani, yái Wáiwacalica. Píalimápínacué pimànica càì yácáiná Wacuèriná Dios, Wáiwacali Jesucristo nacáí nayúudàacuéca pía mawèníiri iyú.

Aclaraciones sobre el regreso del Señor

2 ¹ Siúcade piacué wéenánáica, pialíacuéwa Wáiwacali Jesucristo yàanàanápíná àniwa. Pialíacué nacáíwa Dios iwacáidáanápíná wíawa Wáiwacali Jesucristo yàatalé. Siúcade wawàwaca wéewáidacuéca pía ìwali quiríta. ² Cawàwanáta abénaméeyéi cachìwéeyéi nacàlidapínacué piríni idéca ichàbacawéi Wáiwacali yéenáiwaná yàcaténáwa néese àniwa. Wasutácué pícha wawàsi manuísíwata ipíchaná piúcáida piwàwawa picalùniwa caquialéta iyúwa sícusicuíyéi iwàwa. Picácué cáalu pía áibanái cachìwéeyéi náimacaalícué pirí nacàlidacasa tàacáisi Dios inùmalicuise ímérica idéca ichàbacawéi Wáiwacali yéenáiwaná, càita nacái néewáidacaalícué pía iyú càiri cachìwéeri tàacáisca. Cawàwanáta náasáidapínacué pirí cuyàluta náimérica ìwali nutànàacasacué piríni, quéwa picácué peebáida nachìwa, picácué nacái cáalu pía. ³ Picácué pimàaca áibanái ichìwáidacuéca pía áiba tàacáisi cachìwéeri iyú, ibatàa abéeri tàacáisi iyúpináta. Ipíchawáise Wáiwacali yéenáiwaná yàanàaca yàcaténáwa néese, yá madécaná wenàiwica nawènúadapíná náiwitáisewa Dios ícha manuísíwata, yá càmita nawàwapíná Dios icùaca nía. Abéeri asiali nacái yàanàapíná, máiníiri cabáyawanáca, Satanás inacáiri íiwitáise, yáalimáidéeripíná èeri mìnánái namànínápíná nabáyawanáwa. Máinípiná báawacani, yái asialica, íná Dios idéca íináidacawa imáalàidáanápínáni báisiiri iyú. ⁴ Yái asiali yàanèeripínáca, yácata Dios yúuwidesíwaca báawérica náicha canánama. Yá máinípiná cáimacáica iicáca yáawawa. Icàlidapíná ìwaliwa cachàinicasani Dios ícha, cachàinisa nacáicani macái cuwáinái ícha áibanái yèeyéica icàaluíniná, íná ichùullapíná èeri mìnánái yàaca icàaluíniná Dios ícha. Néese imànipíná càiri báawasíwéeri: Ibàlùadapíná yàasu manuíri yàalubáisiwa Dios yàasu templo írìcu, yá yáawinacawa néré icùacaténá macáita, Dioscáinásani, càipíná ímaca yéewacaténá èeri mìnánái yàaca icàaluíniná. Yá icàlidapínáca iináwanáwa Dioscani.

⁵ Núalíacawa piwàwalicuéca cayábani yái tàacáisi nucàlidéericatécué pirí. Bàaluité nùyacaalítécué piápicha, yáté nucàlidacuéca pirí iináwaná ìwali yáara máiníiri cabáyawanáca yàanèeripínáca áibaalípiná. ⁶ Siúcade pialíacuéwa càirínácaalí chàinisi càimíritàacá ibatàa yáasáidacawa yáara máiníiri cabáyawanáca, àta idécatalépináta yéenáiwaná yàanàaca, Dios imàaquérica írì yàanàacatáipíná. ⁷ Dios imàacaca wáalíacawa Satanás idéca idàbaca iwènúadaca

wenàiwicanáí íiwitáise Dios íicha. Quéwa càmitàacá idé Satanás yáalimá imànica macáita yáí báawéerica iwàwéerica imànica, ìyacáiná siùcade abéeri imáisanìerica Satanás imànica macáita càide iyúwa iwàwáaná imànica. Aibaalípiná yàapinácawa èeri íicha yáí càmfíricáwaca ibatàa Satanás imànica macáita yáí iwàwéerica imànica. Idécanaámi yàacawa èeri íicha, yásí Satanás yáalimápiná imànica macáita càide iyúwa iwàwáaná cháí èeri írìcu. ⁸Néese yáara máiníiri cabáyawanáca wenàiwica yáasáidapinácawa cháí èeri írìcu, yáí asìali Wáiwacali Jesús inuérìpináca caquialéta itàacáí iyúwa. Wáiwacali yàanàapíná cachàiníiri íiwitáise yáapichawa, icamalá mèlumèluíri írìcu nacáíwa, yá Wáiwacali imáalàidapinácani yáara máiníiri cabáyawanáca. ⁹Quéwa néenialípiná, idècunitàacá ìyaca cháí èeri írìcu, yáara máiníiri cabáyawanáca, yásí Satanás ichàiniadapinácani manuísíwata idèniacaténá ichàini manuíriwa. Yásí yáara máiníiri cabáyawanáca imànìpiná madécanaá wawàsi cachàiníiri iyú càmfíiri wenàiwica idé imànica ichìwáidacaténá wenàiwica. ¹⁰Imànìpiná nacáí macáí báawéeri íiwitáaná ichìwáidacaténá wenàiwica Dios yùuwichàidéeyéipíná nabáyawaná ìwaliise càirìpináta càmicáiná cáininá naicáca báisíiri tàacáisi neebáidacaténáni. Dios yùuwichàidapíná nía càmicáiná neebáida báisíiri tàacáisi yéewanápiná Jesucristo iwasàaca nía Dios yàasu yùuwichàacáisi íicha. ¹¹Càmicáiná nawàwa neebáidaca báisíiri tàacáisi, íná Dios imàacapíná cachìwéeri tàacáisi ichìwáidaca nía, neebáidacaténáni cachàiníiri iyú. ¹²Càipíná Dios imànica yáasáidacaténá yùuwichàidáanápíná càirìpináta macáita wenàiwica càmfíiyéica iwàwa yeebáidaca yáí báisíiri tàacáisica, néese casíimáica meedá namànica nabáyawanáwa.

Escogidos para ser salvados

¹³Quéwa wía apóstolca, iwàwacutá wàaca Dios írì cayábéeri càirìpináta pìwalicué, píacué wéenánáica cáininéeyéica Wáiwacali iicáca. Wàaca Dios írì cayábéeri bàaluitécáiná Dios yeedácuéca pía èeri ipíchawáise iwasàacaténácué pía yàasu yùuwichàacáisi íichawa, Espíritu Santo imàacacáinácué Dios yàasu wenàiwicaca pía, peebáidacáinácué nacáí yáí báisíiri tàacáisica. ¹⁴Dios iwàwacáináaté iwasàacuéca pía, íná Dios ibànùacaté wía wacàlidacaténácué píri yáí tàacáisi íiméerica Jesucristo iwasàaca wenàiwica Dios yàasu yùuwichàacáisi íicha. Càita Dios imáidacatécué pía yàasunáicaténácué

pía, yéewanápinácué pìyaca Wáiwacali Jesucristo yáapicha cáimiétacanéeri iyú, icamaláná mèlumèluíri iricu nacái càide iyúwa Wáiwacali ìyáaná.

¹⁵Íná píacué wéenanáica, cachànicué píiwitáise Jesucristo ìwali, peebáidacué itàacái mamáalàacata tàì íiméeri iyú. Picácué piimáicha yái wacàlidéericatécué pirí wàyacaalícué píapicha bàaluité. Picácué nacái piimáicha yái tàacáisi wacàlidéericuéca pirí cuyàluta iricu watànèericuéca pirí. ¹⁶Yá wasutáca Wáiwacali Jesucristo ícha pirípinácué, Wáaniri Dios ícha nacái, yái cáininéerica iicáca wía, imàníirica nacái walí cayábéeri mawèníiri iyú. Càita idéca ichàniadaca wawàwa càiripináta, imàaca nacái manuíca wáináidaca wawàwawa Dios ìwali imànínápiná walí cayábéeri càide iyúwa icàlidáanaté walíni. ¹⁷Yá wasutáca Dios ícha pirípinácué ichàniadáanápinácué piwàwa, imàacáanápinácué nacái pimànica cayábéeri mamáalàacata macái íiwitáanáta, pitàanícáténácué nacái yáawamita cayábéeri wawàsi ìwali.

Oren por nosotros

3 ¹Píacué wéenanáica, iyaca nacái áiba wawàsi quiríta wawàwéericuéca wacàlidaca pirí: Pisutácué Dios ícha walípiná imàacáanápiná wacàlidaca Wáiwacali itàacáiwa áibanái irí caquialéta macái cáli imanúbaca. Pisutácué Dios ícha imàacáanápiná madécaná wenàiwica neebáidaca Wáiwacali itàacái cáimiétaquéeri iyú càide iyúwacué peebáidáaná. ²Pisutácué Dios ícha nacái icùanápiná wía báawéeri ícha, nàyacáiná abénaméeyéi wenàiwica máiníiyéica báawaca íiwitáise, iwàwéeyéica imànica walí báawéeri càmicáiná macái wenàiwica yeebáida Wáiwacali itàacái. ³Quéwa Wáiwacali imànica macáita càiripináta càide iyúwa ímáaná, íná yéewa wáalíacawa ichàniadáanápinácué píiwitáise peebáidacáténácué itàacái mamáalàacata, tàì íiméeri iyú, icùanápinácué pía nacái Satanás ícha, ipíchanácué pimànica pibáyawanáwa. ⁴Manuíca wáináidaca wawàwawa Wáiwacali ìwaliwa iyúudáanápinácué pía pimànicaténácué píacawa mamáalàacata càide iyúwa wachùulíanácué pía. ⁵Wasutáca Wáiwacali ícha pirípinácué iyúudáanápinácué cáinináca piicáca Dios càide iyúwa cáinináanácué Dios iicáca pía. Càita nacái wasutáca Wáiwacali ícha ichàniadáanápinácué píiwitáise píidenícaténácué piùwichàanáwa matuíbanáiri iyú càide iyúwaté Cristo ìideníaná yùuwichàanáwa.

El deber de trabajar

⁶Píacué wéenánáica, wachùuliacué pía Wáiwacali Jesucristo íiwitáise iyúwa, picácué piacawéerida cawinácaalí péenácué càmiíríca iwàwa íibaidaca, càmiíríca nacái ìya càide iyúwa wéewáidáanácué pía. ⁷Píalíacuéwa càinácaalí iwàwacutáanácué pìyaca pimànicaténácué càide iyúwaté wáasáidáanácué pírí wàyacaalítécué píapícha. Néenialí wàyacaalítécué píapícha, wía apóstolca, wáibaidacaté wawèniacaténá wayáapínáwa. ⁸Càmítaté nacái wayáacué píícha yàacàsi mawèníiri iyú. Néese wía apóstolca wáibaidacaté cachàiniíri iyú èeríapi, táiyápi nacái wapáyaidacaténá wayáapínáwa, ipíchanácué piùwichàacawa wàwalíise, càmicáináté wawàwa wáinatalécuéca píríni, ibatàa abéeri péená írí. ⁹Ewita Dios imàacacáaníta wasutácuéca píícha wayáapínáwa mawèníiri iyú wéewáidacáinácué pía, càicáaníta càmitaté wamàni càì. Néese wáibaidacaté cachàiniíri iyú wáasáidacaténácué pírí càinácaalí iwàwacutáanácué píibaidaca cachàiniíri iyú. ¹⁰Wàyacaalítécué píapícha, yáté wachùuliacuéca pía càiri tàacáisi iyú íiméerica: Aibacaalí péenácué càmita iwàwa íibaidaca, picácué pía iyáapíná. ¹¹Quéwa wadéca wéemíacuéca piínáwaná ìwali ínucué pèewibàa abénaméeyéi péená, càmiíyéica íibaida ibatàa achúméeríina íibaidacalési piná. Càmita nabatàa áibanái íibaidaca, néese nasàiwicaca nalí wawàsi meedá. ¹²Níara ínuyéica, càmiíyéica íibaida, wachùulia nía, wasutáca náicha wawàsi manuísíwata nacái Wáiwacali Jesucristo íiwitáise iyúwa, náibaidáanápíná matuíbanáiri iyú needácaténá nayáapínáwa.

¹³Píacué wéenánáica, picácué chamàle pimànica cayábéeri ipíchaná piméyáacawa, néese pimànicué piacawa cayábéeri mamáalàacata. ¹⁴Aibacaalí péenácué càmita imàni càide iyúwa wachùulianáni cháì cuyàluta írìcu, picàlidacué iináwaná ìwali macái wenàiwicanái yàacuésemi, níái yeebáidéeyéica Jesucristo itàacái. Picácué piacawéeridani, yéewacaténá báicani ibáyawaná ìwaliwa. ¹⁵Quéwa picácué piùwide pimànica yái wenàiwicaca, néese píalàacué éeréeri iyútani, càide iyúwacué píalàaca nacáicaalí péenásàiriwa.

Bendición final

¹⁶Wasutáca Wáiwacali íícha pírípinácué, yái imàaquéerica matuíbanáica yàasu wenàiwica iwàwa, imàacáanápíná matuíbanáicuéca piwàwa càiripínáta càinácaalícué pìyáaná. Wasutáca Wáiwacali íícha pírípinácué yàacawéeridáanápínácué pía manuísíwata.

¹⁷Núa Pablo nutànàacué pírí yái achúméerína tàacáisica nucáapi iyúwa nuwàwalicáinácué pía. Càita nutànàacani macái nùasu cuyàluta irícuwa. Càì nutànàacani píalíacaténácuéwa càinácaalí iicácanáwa, ipíchanácué áibanái ichìwáidaca pía. ¹⁸Nusutácué Wáiwacali Jesucristo ícha pírípinácué, imànínápinácué pírí cayábéeri mawènfiri iyú, píacué canánama.

